

Na osnovu člana 24. Statuta Općine Hadžići („Službene novine Kantona Sarajevo“, broj 15/09, 17/12, 10/13, 14/13 - ispravka, 11/18 i 1/20) i člana 10. stav 14. Odluke o izvršavanju Budžeta Općine Hadžići za 2023. godinu („Službene novine Kantona Sarajevo“, broj: 3/23), Općinsko vijeće Hadžići, na 21. sjednici održanoj dana 16.02.2023. godine, d o n o s i

O D L U K U

O KRITERIJIMA ZA RASPODJELU SREDSTAVA IZ BUDŽETA OPĆINE HADŽIĆI ZA 2023. GODINU - PODRŠKA POLJOPRIVREDI -

Član 1.

Ovom Odlukom utvđuju se kriteriji za raspodjelu sredstava iz Budžeta Općine Hadžići za 2023. godinu - podrška poljoprivredi.

Član 2.

Sredstva iz člana 1. ove Odluke raspoređuju se za sljedeće namjene:

1. nabavka nove
 - poljoprivredne mehanizacije i odgovarajućih priključaka (izuzev ATV/UTV/Quad),
 - opreme za mljekarstvo,
 - opreme za pčelarstvo (izuzev nabavke košnica),
2. sufinansiranje projekta nabavke plastenika, steonih junica i projekta pčelarstva,
3. finansiranje promotivnih aktivnosti i ostalih vidova podrške u oblasti poljoprivrede.
4. sufinansiranje drugih projekata iz oblasti poljoprivrede (nabavka sjemena, plastenika, pčelinjih društava, opreme, i drugo).

Raspodjela sredstava vršit će se u skladu sa raspoloživim sredstvima, a najviše do iznosa planiranog Budžetom Općine Hadžići za 2023. godinu za podršku poljoprivredi.

Član 3.

Sredstva iz člana 2. tačka 4. sufinansiranje projekata iz oblasti poljoprivrede trošiti će se na osnovu Javnog poziva koji će se objaviti na oglasnoj ploči Općine Hadžići i na službenoj web stranici Općine Hadžići, ukoliko je isti potreban, u skladu sa potpisanim Sporazumima i Ugovorima, te na osnovu podnesenih zahtjeva, odnosno projekata za sufinansiranje.

Član 4.

Za raspodjelu i praćenje utroška sredstava iz člana 2. ove odluke Općinski načelnik imenuje komisiju od tri člana i tri zamjenska člana.

Član 5.

Uslov za ostvarivanje novčanih sredstava za podršku poljoprivredi je da poljoprivredni proizvođač ima mjesto prebivališta na općini Hadžići u posljednje tri godine.

Član 6.

Za nabavku nove poljoprivredne mehanizacije i odgovarajućih priključaka, opreme za mljekarstvo i opreme za pčelarstvo (izuzev nabavke košnica), dodjeljivat će se sredstva u iznosu od 20% od vrijednosti nabavljene mehanizacije i opreme, a nabavka novih plastenika površine 50 m² i više dodjeljivat će se sredstva u iznosu od 30% od vrijednosti plastenika.

Maksimalan iznos novčanih sredstava za podršku poljoprivredi po jednom korisniku je 5.000,00 KM, bez obzira na nabavnu vrijednost iskazanu u računu.

Za dodjelu sredstava korisnik je dužan podnijeti zahtjev na propisanom obrascu i priložiti:

1. Ovjerenu kopiju lične karte;
2. Uvjerenje o kretanju (original ili ovjerena kopija);
3. Potvrdu o upisu u Registar poljoprivrednih gazdinstava i Registar klijenata;
4. Ovjerenu kopiju računa na ime podnosioca zahtjeva sa fiskalnim računom o kupovini poljoprivredne mehanizacije ili priključaka, opreme za mljekarstvo, opreme za pčelarstvo i plastenika;
5. Ovjerenu kopiju saobraćajne dozvole za mehanizaciju koja podliježe registraciji;
6. Dokaz o posjedovanju odgovarajućeg vlastitog zemljišta za postavljanje plastenika.

Član 7.

Sufinansiranje projekata iz oblasti poljoprivrede vršiti će se u skladu sa uslovima projekta.

Član 8.

Finansiranje promotivnih aktivnosti i ostalih vidova podrške iz oblasti poljoprivredne proizvodnje, vršit će se u skladu sa raspoloživim sredstvima, a na prijedlog Komisije ili nadležne službe.

Član 9.

Za svaki potpun i blagovremeno podnesen zahtjev za ostvarivanje prava na novčana sredstva, imenovana komisija je dužna na licu mjesta utvrditi činjenično stanje i sačiniti zapisnik. Služba za privredu, finansije i inspekcijski nadzor će nakon provedenog postupka o provjeri ispunjavanja uslova kandidata donijeti zaključak o isplati sredstava. Dodjela sredstava može se izvršiti i na osnovu zahtjeva koji su podneseni u prethodnoj godini, kao i zahtjeva koji se odnose na nabavku mehanizacije u prethodnoj godini, sve u skladu sa raspoloživim budžetskim sredstvima i zapisnikom komisije.

Ukoliko se utvrdi da su odobrena sredstva utrošena nenamjenski ili se utvrde druge nepravilnosti nadležna služba će donijeti rješenje o povratu sredstava u roku 30 dana od dana pravosnažnosti rješenja.

Novi zahtjev za ostvarenje prava na novčana sredstva iz stava 2. ovog člana poljoprivredni proizvođač može podnijeti nakon 3 (tri) godine od dana povrata novčanih sredstava.

Član 10.

Odluka o kriterijima za raspodjelu sredstava iz Budžeta Općine Hadžići za 2023. godinu – podrška poljoprivredi stupa na snagu danom donošenja i bit će objavljena na oglasnoj ploči i web stranici Općine Hadžići.

Broj: 01-02-1493/2023
Hadžići, 16.02.2023. godine

Predsjedavajući
Općinskog vijeća Hadžići

Almin Bašić